



Resolución do 29 de maio de 2019, da Dirección Xeral de Educación, Formación Profesional e Innovación Educativa, pola que se convoca a participación no programa de innovación educativa “Club de Letras” para centros docentes públicos da Consellería de Educación, Universidade e Formación profesional durante o curso 2019/2020

O artigo 105 da Lei orgánica 2/2006, do 3 de maio, de educación, establece que as administracións educativas favorecerán o recoñecemento do labor do profesorado dos centros públicos, atendendo á súa especial dedicación ao centro e á implantación de plans que supoñan innovación educativa, por medio dos incentivos económicos e profesionais correspondentes.

Un dos desafíos contemporáneos máis salientables é a necesidade de capacitar ao alumnado para o exercicio do pensamento crítico e independente co que alcanzar unha mellor comprensión do mundo globalizado e de si mesmo. Paralelamente, a investigación e a potenciación dun espírito crítico deben estar acompañados de achegas a enfoques plurais procedentes de distintos ámbitos filosóficos, artísticos, literarios ou históricos. A educación patrimonial, a sensibilidade estética, o pensamento creativo, ao tempo que crítico e rigoroso, precisan das Humanidades, as Artes e as Ciencias Sociais para acadar marcos de sentido cada vez máis complexos, globais e enriquecedores que nos permitan tratar cunha realidade diversa e cambiante.

Debido á aparición das Humanidades dixitais a fenda tecnolóxica entre a clásica distinción entre “ciencias” e “letras” está en forte retroceso, do mesmo xeito que os vasos comunicantes entre as letras e as ciencias están cada vez máis presentes no sistema educativo actual e na demanda de futuros profesionais. A cartografía dixital, a narrativa transmedia ou as artes dixitais son algúns dos exemplos, así como o concepto de “experiencia” ligado ás artes e a literatura.

Por outra banda, o “Club de Letras” resulta unha canle importante para potenciar o emprendemento, o pensamento crítico e creativo na área das Humanidades, as Artes e as Ciencias Sociais. A creación do “Club de Letras” redundará no beneficio do alumnado





que opta por este eido do coñecemento, posto que accede a novas oportunidades de formación, potenciando o sentido da iniciativa e a capacidade para afrontar retos futuros. A importancia de todos estes aspectos favorecerá a súa inclusión e posterior progresión no mercado laboral.

O “Club de Letras” nace coa determinación de ofrecer oportunidades que fomenten o desenvolvemento integral do alumnado acorde ás necesidades da sociedade actual. O centro docente resulta un escenario propicio para desenvolver estratexias metodolóxicas que promovan a adquisición de novas habilidades e sensibilidades, a través dunha invitación ao descubrimento que aumente o interese dos participantes por saber, cada vez máis, sobre diversos campos e manifestacións das Humanidades, das Artes e das Ciencias Sociais.

Estes clubs fundaméntanse nunha metodoloxía baseada no descubrimento, a indagación, o debate, a lectura reflexiva, a análise crítica, a creación e a aprendizaxe colaborativa, na que o alumnado adquire coñecemento mediante un método activo.

De acordo co anteriormente exposto, esta Dirección Xeral

RESOLVE:

Primeiro. *Obxecto e ámbito de aplicación*

Esta resolución ten como obxecto convocar a selección de 30 centros docentes públicos da Consellería de Educación, Universidade e Formación Profesional para participar no programa de innovación educativa “Club de Letras” durante o curso 2019/2020.

Cada centro seleccionado para desenvolver un “Club de Letras” recibirá unha achega económica de 1.000 €. O importe total aos centros será de 30.000 € con cargo á aplicación orzamentaria 10.20.423A.229 da Consellería de Educación, Universidade e Formación Profesional, dos orzamentos do 2019.

Esta dotación económica é incompatible con calquera outra destinada ao mesmo proxecto obxecto desta convocatoria.





Segundo. Destinatarios

Poderán presentar solicitudes aqueles centros docentes públicos da Consellería de Educación, Universidade e Formación Profesional que impartan ensinanzas de educación primaria, educación secundaria obrigatoria ou bacharelato.

Terceiro. Características do “Club de Letras”

O “Club de Letras” defínese como un espazo de aprendizaxe non formal baseado nunha metodoloxía de indagación. Neste marco os docentes suxiren diferentes accións enfocadas ao alumnado co obxecto de que poidan afondar, descubrir e coñecer novos eidos relacionados coas Humanidades, as Artes e as Ciencias Sociais.

O “Club de Letras” destinado á educación primaria achegarse a estes eidos do coñecemento, fundamentalmente, a través da escritura creativa, a exploración e creación artística, a lectura reflexiva e fomentando, de ser posible, unha achega lúdica e dinámica.

No que respecta ao “Club de Letras” destinado á educación secundaria e bacharelato procurárase unha visión transversal e interrelacionada das manifestacións literarias e artísticas, abordar perspectivas filosóficas e/ou históricas, así como a potenciación da capacidade creativa e de lectura reflexiva, coa finalidade de fomentar competencias de comprensión e de pensamento crítico do mundo actual.

Deberá estar formado por un ou máis docentes e alumnado de educación primaria, secundaria obrigatoria ou bacharelato. Un dos docentes actuará como coordinador do club.

Cada centro educativo, dentro da súa autonomía, pode desenvolver o “Club de Letras” de diversas maneiras: fóra do horario lectivo do alumnado, dentro das materias correspondentes de forma transversal ou a través de obradoiros. Este horario deberá cumprir como mínimo unha media de catro horas ao mes, comezando a partir da concesión definitiva do proxecto ata o final do período lectivo do alumnado dentro do curso 2019/2020.

Cada ano partirá dunha temática concreta sobre a que se fomentará a reflexión, a lectura crítica e a achega a novos materiais e perspectivas de xeito transversal. Para o curso 2019/2020 o tema escollido é a igualdade (contribución desde un punto de vista





literario, artístico, filosófico ou histórico a cuestións relacionadas coa visibilización das mulleres, do seu rol na sociedade e/ou representación das mulleres ao longo da historia).

Cuarto. *Solicitud e documentación*

1. Os centros que desexen beneficiarse do “Club de Letras” deberán presentar a seguinte documentación:

- Anexo I: solicitude de participación no programa.
- Anexo II: breve descrición do proxecto que se vai desenvolver no curso 2019/2020 na que se indique:

- a) Propostas de traballo
- b) Previsión de horarios e lugares do desenvolvemento do club

2. Toda a documentación poderá presentarse en calquera dos lugares e rexistros establecidos no artigo 16.4 da Lei 39/2015, do 1 de outubro, do procedemento administrativo común das administracións públicas, e dirixido á Dirección Xeral de Educación, Formación Profesional e Innovación Educativa. Así mesmo, remitirase copia dos anexos (escaneados nun só documento en formato PDF) ao correo electrónico participacioneducativa@edu.xunta.es segundo os prazos establecidos.

Quinto. *Prazo de presentación*

O prazo de presentación de solicitudes e documentación rematará o 30 de setembro de 2019.

Sexto. *Criterios de selección*

1. Proposta do proxecto “Club de Letras”: calidade, coherencia, implicación de docentes e alumnado (ata 50 puntos).
2. Participación do centro en actividades de innovación educativa (ata 30 puntos).
3. Representatividade equitativa das distintas ensinanzas ás que van destinada esta convocatoria (ata 20 puntos).





Sétimo. Dotación económica

1. Cada centro docente seleccionado nesta convocatoria recibirá 1.000 € que serán transferidos nun único pagamento, no período correspondente ao exercicio económico 2019.
2. O importe concedido a cada centro deberase destinar a sufragar gastos que estean debidamente xustificados e imputables á participación nesta convocatoria. En ningún caso se utilizarán para adquisición de materiais inventariables.
3. Os gastos teñen que realizarse na súa totalidade antes do 30 de xuño de 2020 e serán debidamente xustificados ante a Dirección Xeral de Educación, Formación Profesional e Innovación Educativa. As facturas correspondentes deberán ser custodiadas en cada un dos centros, estando á disposición da Dirección Xeral no caso de ser solicitadas.
4. A non xustificación do gasto no prazo establecido poderá ser causa de revogación das cantidades asignadas. O centro deberá realizar o reintegro da cantidade percibida, sen prexuízo das responsabilidades que se lles poidan esixir.

Oitavo. Procedemento de valoración das solicitudes

A Consellería de Educación, Universidade e Formación Profesional valorará as solicitudes recibidas mediante unha comisión que estará presidida polo subdirector xeral de Ordenación e Innovación Educativa e Formación do Profesorado ou persoa en quen delegue, e integrada pola subdirectora xeral de Inspección, Avaliación e Calidade do Sistema Educativo ou persoa en quen delegue, a xefa de servizo de Ordenación, Convivencia e Participación Educativa, a asesora en Innovación Educativa, así como dúas persoas da Subdirección Xeral de Ordenación e Innovación Educativa e Formación do Profesorado, unha delas actuará como secretario.

Noveno. Resolución

A comisión de selección, unha vez avaliadas as solicitudes presentadas, emitirá unha resolución provisional dos centros admitidos. Esta resolución provisional poderase consultar na web desta consellería (<http://www.edu.xunta.gal/portal/>).





Os centros solicitantes dispoñen dun prazo de 5 días hábiles, contados a partir do día seguinte ao da publicación na mencionada web, para realizar reclamacións ou renuncias. Transcorrido este prazo, a comisión de selección realizará a valoración das reclamacións e renuncias recibidas, e elevará a proposta definitiva á persoa titular da Dirección Xeral de Educación, Formación Profesional e Innovación Educativa, que adoptará a resolución definitiva dos centros seleccionados.

O prazo para resolver as solicitudes correspondentes ás accións desta resolución será de tres meses, e comezará a contar desde o día seguinte ao da data de remate do prazo de presentación de solicitudes. Transcorrido este prazo sen que se dite resolución expresa, os/as interesados/as poderán entender desestimadas as súas solicitudes por silencio administrativo.

Contra esta resolución, que non esgota a vía administrativa, as persoas afectadas poderán interpor recurso de alzada ante a conselleira de Educación, Universidade e Formación profesional no prazo dun mes contado a partir do día seguinte ao da publicación na web desta consellería, segundo o disposto nos artigos 121 e 122 da Lei 39/2015, do 1 de outubro, do procedemento administrativo común das administracións públicas.

Décimo. Avaliación da participación no programa

Os centros admitidos nesta convocatoria deberán enviar unha memoria en formato dixital ao correo participacioneducativa@edu.xunta.es antes do 15 de xullo de 2020, onde se contemplan os seguintes apartados:

1. Introducción.
2. Profesorado participante, identificando a persoa coordinadora e as funcións realizadas por cada docente.
3. Descrición das actividades realizadas incluíndo os materiais empregados.
4. Visibilización das actividades realizadas: web do centro, actividades de difusión das actividades, blog, redes sociais, publicacións en revista escolar etc.
5. Certificación dos gastos derivados da participación no programa.
6. Conclusións e valoracións.





A non entrega desta memoria, ou a baixa calidade da mesma, poderá terse en conta en convocatorias posteriores.

Décimo primeiro. *Certificación do profesorado participante*

A Consellería de Educación, Universidade e Formación profesional certificará, segundo a normativa vixente, a participación do profesorado no “Club de Letras” como actividade de innovación educativa, previa avaliación positiva da memoria presentada, cunha equivalencia de 30 horas de formación permanente do profesorado para a persoa coordinadora e de 20 horas para o profesorado participante.

Décimo segundo. *Compromisos do centro e do profesorado participante*

Os centros participantes no “Club de Letras” durante o curso 2019/2020 colaborarán nas accións de difusión das actividades que organicen, así como a cesión a favor da Consellería dos dereitos de edición dos materiais educativos relacionados co desenvolvemento do programa no centro. Estes materiais difundiranse baixo a licenza “Creative Commons” que sexa *BY-NC-SA* que combine as propiedades “recoñecemento”-“non comercial”-“compartir igual”.

Décimo terceiro. *Información básica sobre protección de datos de carácter persoal*

Os datos persoais recadados neste procedemento serán tratados na súa condición de responsable pola Xunta de Galicia, Consellería de Educación, Universidade e Formación Profesional, coas finalidades de levar a cabo a tramitación administrativa que derive da xestión deste procedemento e a actualización da información e contidos da carpeta do cidadán.

O tratamento dos datos baséase no cumprimento dunha misión de interese público ou no exercicio de poderes públicos, conforme a normativa recollida na ficha do procedemento incluída na Guía de procedementos e servizos, no propio formulario anexo e nas referencias recollidas en <https://www.xunta.gal/informacion-xeral-proteccion-datos>. Con





todo, determinados tratamentos poderán fundamentarse no consentimento das persoas interesadas e esta circunstancia reflectirase no devandito formulario.

A fin de darlle a publicidade esixida ao procedemento, os datos identificativos das persoas interesadas serán publicados conforme ao descrito na presente norma reguladora a través dos distintos medios de comunicación institucionais dos que dispón a Xunta de Galicia como Diarios Oficiais, páxinas web ou taboleiros de anuncios.

As persoas interesadas poderán acceder, rectificar e suprimir os seus datos, así como exercer outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en [https:// www.xunta.gal/proteccion-datos-persoais](https://www.xunta.gal/proteccion-datos-persoais).

Santiago de Compostela, 29 de maio de 2019

Manuel Corredoira López

Director Xeral de Educación, Formación Profesional e Innovación Educativa

